

ა ნ გ ა რ ი შ ი

მოგესალმებით, მეგობრებო, დიდი მადლობა, რომ დრო გამონახეთ ჩვენთან შესახვედრად. როგორც საკრებულოს თავმჯდომარე, ყოველთვის მზად ვარ თქვენს გვერდით დავდგე. თქვენ აქ მოხვედით, რომ მოისმინოთ პასუხები კითხვებზე, რომლებიც ძალიან გაწუხებთ, მოისმინოთ ანგარიში ჩვენი გაწეული მუშაობის შესახებ. ყველამ ვიცით რა გვსურს ჩვენ, თქვენი სახით ამ აუდიტორიაში ისეთი ხალხია შეკრებილი, ვინც ყველაზე უკეთესად გამიგებს. ჩვენი აქ შეხვედრის მიზანი ერთი შეხედვით ნათელია და გასაგები. იმედი გვაქვს ერთმანეთის გვერდში დგომით ბევრ სასიკეთო საქმეს გავაკეთებთ ჩვენი მუნიციპალიტეტისა და ქვეყნისათვის.

არც თუ ისე დიდი დროა გასული, რაც ახლად არჩეული საკრებულო თავისი უფლებების განხორციელებას შეუდგა, მაგრამ დღევანდელი გაწეული საქმიანობა უკვე გვაძლევს იმის საშუალებას, რომ ობიექტურად შევაფასოთ პირველი შედეგები.

გასული წლის ნოემბრიდან დღემდე ჩატარებულია 20 სხდომა: მათ შორის: 11 - გეგმიური და 9 - რიგგარეშე.

მიღებულია 67 - დადგენილება და 51 - განკარგულება.

საკრებულოს კომისიების დასკვნების საფუძველზე საკრებულოს მიერ დადგენილებები და განკარგულებები სრულად შეესაბამება საკანონმდებლო მოთხოვნებს.

ცხარე დებატების პირობებში მოგვიწია მუნიციპალიტეტის სტრუქტურის, მერიის სამსახურების, დებულებისა და წესდების, საშტატო ერთეულების, მათი ხელფასის განაკვეთებისა და ამ პრობლემებთან დაკავშირებული სხვა საკითხების განხილვა და დამტკიცება.

ახმეტის მუნიციპალიტეტის 2018 წლის ბიუჯეტი 27 აგვისტოს ცვლილებების შესაბამისად შეადგენს 12 789,7 ათას ლარს. მიმდინარე წლის განმავლობაში ბიუჯეტში შესულია სულ 5 ცვლილება. აქედან შემოსულობების ზრდა გამოწვეულია კაპიტალური ტრანსფერის გადმოცემით, ასევე არაფინანსური აქტივების კლებით. სულ დაგეგმილია 8 966,6 ათასი ლარი ტრანსფერის მიღება.

საკრებულოს მიერ განხილულ საკითხთა და მიღებულ გადაწყვეტილებათა შორის ერთ-ერთი მნიშვნელოვანი იყო მუნიციპალიტეტში არსებული სოციალურ - ეკონომიკური მდგომარეობის და განვითარების სტრატეგიის 2018 წლის სამოქმედო გეგმის ძირითადი პრიორიტეტების დამტკიცება. ამ საკითხის დამტკიცებას წინ უსწრებდა თითოეულ სოფელში გულდასმით შესწავლილი ადგილობრივი

მოსახლეობის მიერ გამოთქმული წინადადებები, შესაბამის პრობლემებზე. ყოველდღიურ რეჟიმში ჩართულები არიან და მოსახლეობასთან ერთად განიხილავენ სოფლის პრობლემების გადაჭრის გზებს მუნიციპალიტეტის საკრებულოს წევრები და მაჟორიტარული წესით არჩეული დეპუტატები.

ძირითად პრიორიტეტად მიჩნეულ იქნა მოსახლეობის ხარისხიანი სასმელი წყლით უზრუნველყოფა, საუბნო გზების მოწესრიგება, საყოფაცხოვრები ნარჩენების გატანა, მინი სპორტული მოედნების მოწყობა, გარე ფასადების მოწყობა, სპორტული ინვენტარის შეძენა, სასაფლაოების მოვლა პატრონობა, სანიაღვრე არხების მოწყობა - რეაბილიტაცია, კულტურის სახლების რეაბილიტაცია, ღამის განათება, დემოგრაფიული და სხვა სოციალური პრობლემების მოგვარების საკითხები.

როგორც თქვენთვის ცნობილია ქ. ახმეტაში მიმდინარეობს სასმელი წყლის სრული რეაბილიტაცია, რომელიც გვამდევს საშუალებას უზრუნველყოთ ქალაქის მოსახლეობის 24 საათიანი წყალმომარაგება. პროექტის დასრულება ძალიან გაჭიანურდა, რაზეც საკრებულოს წევრებს ბევრჯერ გვექონდა მსჯელობა. 2018 წელს ახმეტის მუნიციპალიტეტში საკმაოდ დიდი მოცულობის ინფრასტრუქტურული სამუშაოები ტარდება, რომელთა ჯამური ღირებულება ოთხ მილიონ ლარს აჭარბებს.

მინდა შევახსენო სოფლებში მერის წარმომადგენლებს და საკრებულოს დეპუტატებს, რომ ადგილზე მისაღები გადაწყვეტილებები აუცილებლად შესაბამისი სოფლების ინტერესებიდან უნდა გამოდიოდეს.

უნდა აღინიშნოს ისიც, რომ მიწათსარგებლობის საქმეში როგორც ქვეყნის მასშტაბით, ასევე ჩვენს სოფლებშიც კვლავ არასახარბიელო ვითარებაა შექმნილი. მოსახლეობის მიერ პრივატიზაციის შედეგად მიღებული მიწის ნაკვეთების ნახევარზე მეტი საჯარო რეესტრში არ არის დარეგისტრირებული რაც მნიშვნელოვან წილად არასრულად გადაცემული დოკუმენტაციის ბრალიცაა. მიწის საკითხების მიმართულებით მეტად დაძაბული მუშაობა უწევთ მიწის საკუთრების უფლების აღიარების კომისიას. განვლილი ერთი წლის განმავლობაში კომისიამ განიხილა 373 განცხადება.

სისტემატური ხასიათი აქვს საკრებულოს წევრების შეხვედრებს ამომრჩევლებთან. მოსახლეობის მიერ დაყენებულ საკითხებს და მათ მიერ წარმოჩენილ პრობლემებს ანალიზი უკეთდება და სათანადო რეაგირებისთვის წინადადებებით მივმართეთ შესაბამის სამსახურებს, რომლის დროსაც მათი მნიშვნელოვანი ნაწილი დადებითად გადაწყდა, მაგრამ არც თუ ცოტაა სათანადო რეაგირების გარეშე დატოვებული საკითხებიც, რასაც შემდგომში მეტი ყურადღება უნდა მიაქციონ საკრებულოს კომისიებმა და მერიის შესაბამისი სამსახურის ხელმძღვანელებმა:

ჩვენგან განსაკუთრებულ ყურადღებას და მზრუნველობას საჭიროებს ახალგაზრდობასთან მუშაობა. მათი სპეციალობებისა და შესაძლებლობების მიხედვით

დასაქმება ჯერ კიდევ სერიოზული პრობლემაა, მაგრამ თუ გავითვალისწინებთ, რომ ახალგაზრდობის უმრავლესობა თვითდასაქმებითაა დაკავებული, საჭიროა, რომ სოფლად მცხოვრებ ახალგაზრდებს სათანადო პირობები ჰქონდეთ შექმნილი კულტ - მასობრივ და სპორტულ საქმიანობაში აქტიური მონაწილეობის მისაღებად. ამ მიმართულებით მუნიციპალიტეტში მნიშვნელოვანი ღონისძიებები იქნა დასახული და ბიუჯეტიდანაც საამისოდ გამოყოფილი თანხები რამდენჯერმე აღემატება წინა წლების მაჩვენებლებს.

2018 წლისთვის მუნიციპალიტეტში ფუნქციონირებს სამი სპორტული სკოლა: კომპლექსური - სასპორტო სკოლა, ზ. ზვიადაურის სახელობის მიუდოს სკოლა და ახმეტის საფეხბურთო სკოლა „ბახტრიონი“.

სამ სპორტულ სკოლაში ფუნქციონირებს სპორტის ათი სახეობა. ამ სექციებში ვარჯიშობს 1000 სხვადასხვა ასაკის ბავშვი, რომელთაც ემსახურებათ 46 მწვრთნელ - მასწავლებელი.

სპორტული სკოლები ატარებენ შიდა ღონისძიებებს და მონაწილეობენ გასვლით შეჯიბრებებში, როგორც ქვეყნის მასშტაბით, ასევე საერთაშორისო ტურნირებში.

სკოლამდელი აღზრდისა და განათლების დაწესებულებების ეფექტიანი ფუნქციონირების უზრუნველყოფა მუნიციპალიტეტის ერთერთი საკუთარი უფლებამოსილება და პრიორიტეტია.

სულ მუნიციპალიტეტში ფუნქციონირებს 38 საბავშვო ბაღი, აღსაზრდელთა რაოდენობა შეადგენს 1543 ბავშვს. სკოლამდელი აღზრდის დაწესებულებების კეთილმოწყობა კვლავაც ჩვენი აქტიური ზრუნვის საგანი იქნება.

საკრებულოს საქმიანობის ერთერთ უმთავრეს პრიორიტეტს წარმოადგენს მოსახლეობის სოციალური პირობების გაუმჯობესება: ავადმყოფთა ოპერაციები, წამლებით უზრუნველყოფა მრავალშვილიანი და ახალშობილთა ოჯახების დახმარება და სხვა.

სოციალურად მოწყვლადი წევრების დაფინანსების რაოდენობა ყოველწლიურად იზრდება.

საკრებულო აქტიურად თანამშრომლობს არასამთავრობო ორგანიზაციებთან; ამის არაერთი ნათელი დადასტურებაა გერმანიის საერთაშორისო თანამშრომლობის საზოგადოებასთან (GIZ) ერთად განხორციელებული არაერთი წარმატებული პროექტი: ბიომრავალფეროვნების ინტეგრირების მართვა, სივრცით - ინფრასტრუქტურული განვითარების რეგულირების შემუშავება. რაც იძლევა მომავალში უფრო მჭიდრო თანამშრომლობის საფუძვლიან ვარაუდს.

საკრებულომ მნიშვნელოვანი ნაბიჯები გადადგა გენდერული თანასწორობის განვითარების კუთხით.

ახმეტის მუნიციპალიტეტის საკრებულო ერთერთი პირველი იყო, სადაც შეიქმნა გენდერული თანასწორობის საბჭო და მისი სამოქმედო გეგმა.

საბჭოს სამოქმედო გეგმის ძირითადი მიმართულებაა ძალადობის წინააღმდეგ ბრძოლა, მოწყვლადი ჯგუფები: ბავშვები, მოზარდები, ხანდაზმულები, მარტოხელები, მრავალშვილიანები. საბჭოს მუშაობის მიზანია ნებისმიერი გენდერული დისკრიმინაციული შემთხვევების გამოაშკარავება, მისი აღმოფხვრა, ადრეული ქორწინების პრევენციაზე მუშაობა, სამოქალაქო სექტორის ცნობიერების ამაღლება გენდერული თანასწორობის კუთხით. ჩვენი სლოგანებია „ თანასწორობა, ეს არის ის, რაც სწორია“ და „ ჩემი სახლი ძალადობის გარეშე“.

აღსანიშნავია, რომ მიმდინარე წლის 24 სექტემბერს „ ადგილობრივ თვითმმართველობათა ეროვნული ასოციაციის“ მიერ მოწყობილ ფორუმზე გაწეული მუშაობისთვის მადლობა გადაგვიხადეს საერთაშორისო ორგანიზაციების წარმომადგენლებმა.

ჩვენი ხელისუფლების ერთერთი ყველაზე დიდი საფიქრალი თითოეულ მოქალაქეზე ზრუნვაა.

საკრებულოს კონკრეტულ შედეგებზე ორიენტირებულ საქმიანობას მნიშვნელოვნად განსაზღვრავს კომისიების კარგად, ორგანიზებული და ეფექტური მუშაობა. აუცილებელია, რომ საკრებულოში არსებული ხუთი კომისია ყოველთვის პრინციპულად უდგებოდეს საკრებულოს მიერ მისაღები დადგენილებებისა და გადაწყვეტილებების პროექტების წინასწარ განხილვას და მათში შესაბამისი კორექტირების შეტანას.

საკრებულოში ფუნქციონირებს 5 ფრაქცია.

განვლილ პერიოდში საკრებულოს თავმჯდომარესთან მიღებაზე იმყოფებოდა 300-ზე მეტი მოქალაქე.

ამავე პერიოდში ქვეყნის ხელისუფლების სხვადასხვა სტრუქტურებიდან შემოსულია 65 წერილი, ყველა მათგანზე განხორციელდა შესაბამისი რეაგირება.

ბვირფასო მეგობრებო!

მე კარგად მაქვს გააზრებული, რომ ჩემს მიერ წარმოდგენილ ანგარიშში წარმოჩენილი საკრებულოს მიერ განხორციელებული ღონისძიებები და დღემდე გადაუჭრელი პრობლემები პირდაპირ კავშირშია ჩემი, როგორც საკრებულოს თავმჯდომარის პერსონალურ პასუხისმგებლობასთან. ვცდილობ მაქსიმალურად გამოვიყენო ყველა ის

შესაძლებლობა, რაც ჩემი კომპეტენციის ფარგლებშია. პრაქტიკულ საქმიანობაში ვითვალისწინებ იმ გამოცდილებას, რომელიც წლების განმავლობაში სხვადასხვა საქმიანობით შევიძინე.

მინდა მადლობა გადავუხადო საკრებულოს ყველა თანამშრომელს განვლილი დროის განმავლობაში გაწეული საქმიანობისთვის. უდიდესი პატივია ვემსახუროთ საკუთარ ქვეყანას და ადამიანებს უკეთესი ცხოვრების შესაძლებლობა შევუქმნათ.

ბოლოს, კიდევ ერთხელ დიდ მადლობას გიხდით მოზრძანებისთვის თანამშრომლობისთვის.

სურვილს გამოვთქვამ ერთად დგომით შევეცადოთ უკეთესი მომავალი შევუქმნათ ჩვენს მუნიციპალიტეტს და საქართველოს.

საკრებულოს თავმჯდომარე:



თამარ ყვინიშვილი

